

郭襄靖公遺集

郭襄靖公遺集卷之二十四

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

書翰 廣西巡撫

東殷石汀

恭聞廣中諸路俘獲多功仰忝威稜籌畫先聲奪

人嶺海廓清燹鼎勲庸當與天壤並永矣忻賀何  
可言此時惠潮想已報捷翁章程既定將吏趨命  
不遑毋煩節鉞移鎮是所至懇府江功次擒馘四  
千二百有奇雖穿窬草石者未能盡鋤而遠近諸  
猺無不落膽懾息昨撫夷道揭稱荔浦永安一帶  
諸獍處處願編籍爲氓立里當差蓋朦朧三峒及  
仙迴高天蒲山諸巢蕩掃足寒羣醜之心士民皆  
云曠古之所僅見者也非仰承神算何以得此但  
咽喉之地關係匪輕善後之計不可不審尊教誠

洞燭之矣諸道議於三峒改南源峰門二巡司爲  
土司募兵一千五百名仙廻募兵一千名各耕守  
其地東岸議於地名水滸亦立一土司募兵耕守  
並復廣運足灘二堡但三峒仙廻地廣且饒而東  
岸地或不足稍費兵食耳府江道欲添設叅將於  
昭平撫夷道欲添設叅將於荔浦分守道欲移總  
兵於昭平愚見總兵係統轄全省移之昭平是以  
偏裨視之也此議似屬非便東岸雖多逸賊然民  
獐錯處其內則皆富賀地方亦鮮連合之患若西

岸之賊向皆三峒仙廻永安諸巢糾連出沒且三  
峒內連陽朔外通洛容及柳慶諸賊則荔浦尤爲  
要害金之說似爲長矣必不得已則叅將往來於  
昭平荔浦之間亦計之得者總之府江善後之費  
當即取諸額用之餉必不能如永寧之例歲歲仰  
給於藩司也鄙意中旬前後一面報功將屯兵耕  
守諸事宜一面處置留都司王承恩暫理其事看  
事勢孰爲緩急輕重而後具

題添設何如昭平復縣之議守兵諸道親行相

河西爲極勝之區此本地方大計誠所當從鄙意亦須地方盡寧而後立縣設官以施禮樂教化之事方爲停妥不然不惟目前版築之煩而防守之費當益倍矣端請剖示報功䟽並望賜教尤悵

東槐叅戎寅

承教備仍加意隣封但倡亂之黨俱係切近懷遠縣治及板江一帶諸徭其與靖州綏寧隣界諸伶洞原無干預惟恐兵進之後諸徭或奔越界外故有遏截之行爾此間官兵正月初三日已集融縣

漸次發行各賊聞風糾衆數千船三百隻出至融  
縣長安鎮地方爲拒敵官兵之計被把截鄉兵邀  
擊生擒五名斬級一十九顆奪賊船三十餘隻初  
五日已發兵長安鎮計此時當與賊交鋒矣審據  
生擒猺賊云若拒敵不勝方退遁郡鄧大山此山  
卽黎平之界也大都諸賊必無遠奔湖貴之理特  
防範不容不嚴爾借重威稜羣醜自爾讐服何寡  
弱之足慮哉草復

東呂豫所

府江之役仰承石畫收功萬全賊遺田地盡議屯  
兵耕守從而開通水陸道路雖初年稍有所需一  
勞久逸真地方永世之利也懷遠之師挑選精銳  
并新調之兵實數三萬有奇其勢不爲不厚但倡  
惡諸賊近糾板江以下諸徭出長安鎮阻兵其生  
擒者多板江之徭也總兵該道決計並剿視原議  
猷剿近縣數十村其難易似有不同且彼中雨雪  
連旬士馬有凍死者各兵進至丹陽復退出一舍  
休屯長安鎮待晴而發幸諸賊恃險自固或無他



逸之虞耳顧主帥偏裨各以意見多相舛迕而呼  
吸機宜又有難以遙制者未卜其底績何如卽日  
親往調度矣先此附聞尚容嗣報

東殷石汀

蒼梧守道入省聞翁將移鎮羊城不審果否府江  
殘徒搜剋殆盡諸道皆云今惟屯兵耕守從而開  
通水陸道路誠永世之利也惟懷遠之師初八日  
自長安鎮發兵十一日方抵板江緣板江以下諸  
徭臨時叛撫則衆寡難易之勢與原議既有不同

而王世科等各執意見并從東路而行且欲先內  
剿倡惡而後外及黨惡之徒與主帥甚相舛迕又  
值雨雪大作兵無棲身之地至有凍死者未有一  
刃之交一矢之接各土酋暗相結約遂寅夜退回  
長安然亦僅一舍耳使休養銳氣稍俟晴明而發  
亦無不可者廼將怯兵怠逸歸者十之三四矣雖  
有續出東蘭常起雲勁兵三千思恩永定等處兵  
二三千名恐渙散之勢難以卒集爲之奈何連日  
多方催督破格鼓舞不知可濟於事否總兵談道

惟以參究爲足了事殊鮮討賊之意可痛恨甚矣  
可痛恨甚矣唐溪南公相議姑且置之看其果不  
能集果不復進而後會參此意甚善府江功疏諸  
司皆勸亟

題恐將來與懷遠參疏相併功罪或有未別也不獲  
已差人徑往雖各哨尚有續獲之功不及待矣惟  
翁亟賜遣行至懇至懇聘爲懷遠一事憂苦半年  
形神交瘁迺今垂進復退欲俟秋間再舉豈蹇劣  
孱弱之所能堪擬將來於懷遠疏中力懇休退別

選才望以充此任此肝腑之言非襲套也望翁有以教之鹽船自十月初發去至今尚未回轉則求一歲三運恐不可得矣併白

柬張鶴樓

生命蹇才疎值茲多故府江之役方幸告成竊擬移師聲罪一舉了此省他時徵發之擾生亦緣之求退爲菽水圖不謂天時人事不偶乃爾初聞之亟欲從重題叅乃藩臬諸司力以左次無咎爲解且恐重

廟堂南顧之慮姑且置之以責其成耳唐溪南按院  
意亦云云伏承台教仰見門下爲棗梓厚念爲不  
肖忠謀豈區區及將吏輩已耶行且以雨雪連旬  
阻兵未進請增調勁兵以圖萬全意聞之于朝其  
縣鎮之防業已申飭之矣附謝不盡

東計厚菴

府江之役仰仗庥庇幸已告成竊擬移戈西向聲  
罪懷遠尚可伸威雪憤從而休兵息民寔所素心  
不謂天時未順雨雪連旬嚴凝凜烈之氣殆粵中

數十年所僅見者坐是兵士不堪苦告休息卽鶴樓文臺諸公亦貽書切以爲言與其輕進取敗不如重發圖成不獲已完師以退矣顧原議摘剽倡惡諸巢近板江下徭與之合黨則衆寡難易之勢自有不同秋間特舉勞費更倍奈何

東陳幼溪 蔣松屏 張鳳臺 計益軒

僕命蹇才疎值懷遠意外之變焦勞半載形神交瘁竊擬移戈一舉足以雪憤伸威免他時徵發之擾從而休兵息民與地方相安無事僕之本心也

不謂天時人事不偶如此初聞官兵左次長安甚憤各官無毅然討賊之意徐察之雨久不止不惟寒凍異常而溝盈泥濘人馬病之深入賊地恐非我軍之利張鶴樓徐文臺諸公貽書皆以爲言則完師而退選鋒再進未爲非計也第未有以仰副廟堂討罪之心是所夙夜惶惕耳府江自䟽聞之後擒馘又數百功詢之各道僉謂永無後患其一二遁匿殘徒業已行令招撫安插矣所遺田地甚多方在委官清勘擬給還民業之外盡以屯兵耕守

改昭平坐鎮都司爲叅將復四巡檢司爲土司卽  
以有力量頭目充爲土舍守三峒仙廻兩岸諸地  
久安之計斷在於是候會議歸一方敢具

題其叅將擬以掌印都司王承恩任之出與議也善  
後之事已一面屬之經理矣望一預達職方暫停  
他推是所祈懇

東殷石汀

聞節鉞移鎮羊城傾瞻彌切懷徭近日復寇長安  
之罌頭村其黨以數千計賴守兵奮擊大挫而遜



擒斬雖無多而棄甲倒戈亦足以少奪其氣矣但  
報復之心未已則防守之計日嚴如餉費何後著  
之舉縱不能如李總戎所議大都非多用浙兵衝  
鋒必難取勝借調東兵勢不可少藤牌鳥銃皆軍  
中所急需者不獲已并以咨瀆惟預行所司早以  
賜用不勝祈懇

又柬石汀

藩司承差回得奉手翰知嶺東已奏凱且節鉞回  
端有期喜極喜極府江屯守諸事已有次第今往

來無少驚虞非仰仗威德何以得此惟黎福莊一  
黨尚衆王朝器遽有其地仇爭未已近且波及高  
村爲挾招之計蓋掣兵封刀繼以撫處此必然之  
理也生之督責亦屢屢矣所司以陪送直指公之  
故不暇力行也彼醜欲歸無所卒致奔突今該道  
已差官招之而王朝器亦回仙家冲故處諒可無  
患矣懷遠諸徭自長安再挫後今不復出聞有求  
招意該道責其獻出首惡尚未卜何如要之羈縻  
之策終不可少也惟秋舉之議總帥其難其慎主

於廣募剡兵而公帑苦於不繼諸司道皆有難色  
卽擬奏留事例贓罰僅二萬有奇欲望內帑之發  
他省之助恐必不可得矣落落難合賤體且病奈  
何惟翁軫念不吝督示庶得奉以從事也東事雖  
竣浙兵萬乞盡留以惠西役至懇

東趙汝泉 史蕙津

懷遠諸猺兩出長安鎮皆被兵民大挫而遞今不  
敢復出且告招矣但黨與頗衆非分道夾擊不足  
成功湖兵之借初擬五千後慮餉餽之難乃以三

千爲請今以得名名實數方可以成一軍倘得添至四千五千所謂多多益善者也不然恐勢薄而賊敢於我抗矣萬惟留神督發大都以秋仲之末秋季之初爲期也申懇不一

又柬蕙津

僕以菲庸當茲多事之地府江之役頃方告成竊擬移戈聲罪懷遠苟足伸威雪憤從而罷兵息民與地方更始寔所素心不謂天時未順連旬陰雨士馬有凍死者諸將吏懇以爲言不獲已完師而

退矣秋間特舉議借永順一兵由靖州取路以出其後成腹背受敵之勢不能不仰控於鄰封也倘藉威猷削平醜逆大德之在西陲豈淺鮮哉或議兵從播揚所而進使黃土諸獠不敢驚疑未審地利果便否附瀆

東萬合溪 俞虛江

僕奉職粵中前後十有七年諸獠蚕食之害所目擊而憤心久矣輒不自揣冒然爲之幸爾告成寔出意擬之外今孤舟夜泊無虞修荔諸獠悉告編

戶非仰藉寵靈何以得此惟是懷遠聲罪之師竟以雨雪未果至煩特舉之議勞費倍蓰卽不才之心力亦旣殫瘁矣奈何聞敵郡地方未靖日暮塵起剽刦無忌勢將移之城市重之歲惡尤有足虞者門下以一夫不獲爲念其何以銷茲禍萌俾濱海殘黎永享樂利之明賜耶懇切

東方瞻岨

去秋聞吾丈蒲服東歸屬有兵革之役弗及一慰缺然久之無何彼中之䟽無問識不識爲之錯愕

不平夫事脩興謗德高來毀自昔記之然未有顛  
倒白黑至如彼人也高太湖憲長暨南寧倅劉維  
藩者皆至自蜀中弟得詰其故甚悉固知青天白  
日無有於浮雲矣及見部覆之文近又見省中封  
事信美玉雕磨益光奚足以損而彼人者祇自為  
累爾役回承教并示所由彼人之心事尤可識矣  
僕以菲庸濫叨重寄役役干戈之務殊背夙心府  
江之役頃方告竣行復有懷遠聲罪之師形神交  
瘁采山釣水之思日切切爾他復何覲哉人便勤

此不盡

東殷石汀

差役回迭承手翰并公移賜教蓋翁尚未聞官兵  
盡散猶惓惓示鼓舞激勵之意如此生連日與司  
道總帥計議稍有次第除湖兵狼兵外浙兵用七  
千二百名而總哨員役不與焉借之東省者五千  
取之福浙者二千二百然總帥猶萬不快意云若  
少一名彼斷不敢擔承其執議之堅乃爾總之無  
非慎重圖全意也但福浙之募原非



題請未必可得幾何所恃最便者惟東省耳所仰賴者惟臺下主持耳况嶺東大捷已奏東南二路各營兵俱屬空閑分此五千之數計易易也脫嶺西有所舉動必不宜專用制兵卽以原在嶺西者用之足矣萬祈早賜處分似此規模非八九萬金不可而善後者尚未計也此外欲作小巧工夫或掩撲近村或懸購倡惡或摘用土官無不極意行之尚未有應之者而總帥該道皆有難色以爲必舉大動衆而後可以圖成必制兵銃手而後可以取

勝舍是無所謂奇策也故不得已復有奏留之議  
惟翁慨然會行庶可得請也尤懇生多病積弱自  
度不任驅馳敢曰高尚云乎屢指示勉強支持不  
敢輒萌他念然如悞事何胡大叅順道過家實出  
省覲至情且其意不欲遠離親側倘赴任稍遲得  
免入覲之行尤一便也敢爲預申此意

又柬石汀

林道乾挾衆出海無非逃生之計恐目前只流突  
閩廣海鴻未必遽投異域但此黨甚悍非他寇比

爲今計可防而未可圖也門下所示蓋洞燭之矣  
倘在近島卽設法招之亦無不可不則果投異域  
又將有勾引之患閩廣之憂方大矣桑梓在念兼  
有并州之思敢吐其愚如此

東內閣冢宰

府江自收師之後水陸底寧遠邇稱快屯守諸事  
業已處分非仰仗寵靈何以致此善後之請所以  
銷萌保泰爲地方永圖非敢爲是多事也懷遠叛  
獍頃復糾衆突出長安鎮爲報復計被守兵要擊

大創而遁所傷溺頗多生縛數酋已顯寘之法今  
與居民尋盟不敢復出矣但徒黨甚繁且恃堅甲  
之利若深入致討與應兵不同總帥之議謂狼兵  
不足專恃必增募浙兵以爲先鋒無非慎重圖全  
之意顧餉費不貲帑藏難繼不獲已有奏留錢糧  
之請統乞允行

副東呂豫所

向者懷遠之舉李總戎實司總統之寄聘以府江  
之役未竣不及親往凡軍中事宜雖有定議而臨

機制勝悉聽便宜行之及兵至融縣賊出長安總  
戎與叅將王世科意見乖迕總戎欲先剿外徭叅  
將欲先剿內徭又先差人進入三甲脇取印信欲  
少需之以待其出彼此方在持疑值雨雪大作連  
旬不止跋涉愈艱兵心寢以困怠遂不果進此則  
王世科之過也聘初聞時甚憤裨將不受節制主  
帥亦鮮調度之宜徐察之雨多泥濘寸步難行夫  
亦時勢使然耳完師以退未必非我軍之福也後  
印信果於彼時報獲特王世科此計不與總戎協

議蓋將官詭譎專功常態致生嫌隙耳按院與聘  
各節次差人至彼中探訪兵過長安方四十里尚  
在融縣之界一矢未交一卒無挫又張鶴樓諸公  
寓書備言難進之因乃敢遽實以聞其疏則出按  
院所具也恐重

廟堂南顧之憂輒敢瑣佈府江地方誠不意有此帖  
服卽不復土司不用屯戍亦可博二三十年之安  
但以此機會而苟且塞責不爲永久之圖萬分可  
惜况腴田十萬而山中竹木香藤之利甚多若不

招人屯種則遠近徭獐垂涎者多久而招羣引類日侵月削又將數百里之疆土而棄之矣且所借司餉五千梧餉五千次年即可扣償其他皆府江原用之餉則亦何憚而不爲哉所招屯種之人或兵或民皆從其便今住居耕種者已十之七八矣土司亦非取之土官但有力量能管束衆人者卽用之今俱有次第矣非如古田之費力難處也惟昭平設縣各司道力以爲請固保安地方至計但一時似覺多事必俟三年之後積其餘餉方可圖

成故可以預議而未可以遽設此聘之愚慮也均  
惟主持地方幸甚

柬呂豫所 陳紉溪

懷遠之舉總帥初議除狼兵湖兵外用剡兵二十  
六營生與之反覆論較深以餽餉之乏道路之擾  
解散之難爲憂今稍從減省議借廣東浙兵五千  
又於浙省增募三千四百名但廣東方有海上之  
防恐未必如期借用至浙省之募非奉

題允尤恐彼中慢視不肯慨行如何如何然生不才



猶竊有請焉聲罪之役與除患之師不同除患之師非根株悉拔不足以弭後患聲罪之役主於伸天威正王法不在盡類而殲夷之也況諸徭之變本於縣官所激而長安兩挫擒馘幾四十徒傷溺死者尤不可計印信亦已退還以十萬之兵從事於不毛之地非不可快心於一逞然如勞民耗餉何此生之所深憂而甚懼者議者欲乘乞招之時暫示羈縻之策通以間諜假以從容責令各巢擒獻倡惡與衆戮之殲渠魁而脇從罔治則滅未嘗

不伸法未嘗不正而地方得免用兵之勞擾輕重較然此又生之所自知而不敢自言者已行道叅等官密切圖之然不敢必也一面徵兵聚餉爲大舉計矣倘

廟堂之上有厭兵重餉之意於奏留錢糧旨內示以相機剿撫聽其便宜則將吏之奉行尤不敢不謹矣此意不敢他白蓋恐不亮者以聘爲塞責了事則生之罪尤無所遁矣輒以顓請統惟指示

東俞虛江

春來屢塵誨翰深荷記存李山人使至復承手教  
感戢何任山人不入省門至陽朔始折柬相示殊  
以此地爲安其辭曰糊口之計豈自昔騷人達士  
雲霞麋鹿獨得之趣固然耶茲已作書趣之且當  
爲一力之助不審其高志竟可轉移否府江仰仗  
寵靈征後甚妥招出殘孽僅三四百徒亦就安插  
矣山人來書云數千里盜賊之區今可以通夜而  
行獨舟而遊非謾也惟懷遠之役尚需特舉耳近  
閱報二華公被宸眷甚渥我公北行之命在旦夕

矣生也神力交疲長林豐草之思日惟切切復有  
他覲耶役旋裁謝不盡

柬李山人杜

頃得虛江來書云山人將入粵挈家東歸日惟馳  
神異諧晤語忽承翰教喜不自勝視之則發自來  
仙洞已邈然不可卽矣悵望何如古之達士入山  
惟恐不深入林惟恐不密山人幽致高出流俗萬  
萬鄙人何敢以塵囂之說而溷玄漠之思顧友朋  
之情棄梓之誼亦有不容以竟闕者山人蓋嘗慕

少陵之風矣洛城胡騎與溫陵之安何如錦水澄  
悠與荔江之險何如而宵立晝眠俛仰蕭瑟之悲  
少陵或不免焉山人非避地者豈耽志蛇豕之封  
而終忘刺桐之戀耶山人試思之虛江寄言申申  
相屬輒敢傾吐于鬲如此他不多及外具白米二  
石少將問勞之忱倘脂轄道途則一力之助鄙人  
所不吝也諸惟心炤

副東陳與松

執事者弘猷邃蘊雅負經綸鄙人所敬畏久矣嘗

私自儀想充公之才之志必將翱翔千仞儀羽清  
時廼坐求全之毀竟以不白孰不爲公惜之來教  
云云有未果忘世之意視彼悻悻窮日者何啻萬  
里則尤鄙人所敬且畏也顧人生顯晦升沉莫非  
定數有所嗇者必有所豐天道栽培之機自有不  
爽者在二郎性資問學已自不凡茲日聞嚴君詩  
禮之教所以磨礪德業養其中才又不特取青拾  
紫之爲易易也以此較彼孰得孰失孰重孰輕公  
達觀之早矣况公之事則誠屈但一寘觀察之列

東坡全集 卷二  
便難改移孫栗亭霍勉齋二公皆在被論而不在  
考察其機會不能無別者固然也公之事體大都  
與敝鄉戴筠臺例耳且近例甚隘止於境內而不  
敢旁及鄙人愛莫能助爲之奈何恃在知己輒敢  
傾吐

### 東殷石汀

承示懷遠之事當以多調狼兵爲主誠至論也廼  
總戎及談道之意堅欲廣募潮兵聘與諸司道再  
三論較除借調東省營兵及湖兵外尚募用浙兵

三千四百名反覆辨議不啻聚訟不獲已遣官以  
往不知采山年兄肯作成幾何以勢度之恐必不  
可多得也所恃者惟東省營兵耳大都獍非獍比  
而鐵甲之利上游之險又非他獍之比狼兵長於  
搜捕而短於衝擊若非濶兵牌銃狼筈不足以嬰  
此寇之鋒生晝夜籌度固不可過於張皇而亦不  
敢視以忽易向者兵退之後二月十三日諸叛獍  
復出長安時永寧下六里以及上油都早諸獍皆  
陰有蠢動之意幸而兵民要擊賊大挫遂而諸獍



始復畏帖此實制兵鳥銃手王鸞等二百名之力也然則此舉乃諸夷觀望所係不獨一懷遠也可不爲萬全之慮哉以區區愚計討罪之師苟可得罪人正王法足矣此舉只以一月極至月半爲期隨即撫處則客兵雖用而費亦不甚多即府江之餉或足了此儘奏留之數并分外搜括以充之可庶幾矣嶺西之役旣不可已東省營兵先借五千以應西舉餘皆休息養銳待西事稍竣量留狼兵數千善後其餘盡數東發順流直抵從天而下如

摧枯拉朽耳不亦彼此兼得乎謀之總率司道皆  
以爲然願垂察焉各土兵已差官分調矣仰望威  
嚴亟行督責得在八月齊集則萬分之幸也至懇  
但總率開報賊徒不下數萬欲爲一網打盡之計  
此不惟於心不安亦力所必不能竊恐四面皆敵  
所係非細故也再三思之若不大加分別如翁古  
田成算則事勢大有足慮萬一失悞悔何可追總  
率及二道惟知以賊衆兵寡爲辭不思箇中稍尋  
簡易之法而二道之拘繩守墨尤甚雖言之諄諄

督之屢屢恐未必能有爲也茲復申行之矣府江道轉蒼梧分守代之者福建叅議徐君作也府江善後事體正在緊切擬留鄭君暫理三兩月何如

### 柬殷石汀

連日迭奉台教知東事大定翁所以爲西事謀者無不根極要領盛念撫處分別此不易定論業已再三督道叅及推官高曰化爲之而實心處理者甚少卽向日板江諸獍合黨拒敵皆坐此輩所誤故也生向亦有若不肯分別而必爲一網之計則

鄙人惟有引去聽諸君自爲之說奈拘拘者之不能  
有濟何近不得已行撫夷道協之矣想藩臬二  
長能道其詳也藩帑餉銀尚十萬有奇當專備永  
寧之用奏留約可四萬民欸馬價及稍無碍者可  
得二萬鄙意且儘此數用之或可不必多益也浙  
兵雖募必不能多得但得東省營兵如數蚤發亦  
可無藉於彼矣府江所費餉銀僅及二萬方總帥  
初至閱仙廻圖用甚有難色亦有募浙兵之議生  
堅執不從不獲已許募烏銃手二百名其意實以

備懷遠也若如所議則府江之餉且倍之矣大都  
近來將官慣用募兵未必盡有他念李帥忠勇任  
事特其意謂先剿而後可撫與我輩議論不同故  
作用不同耳官鹽已到省下每包定價八錢未有  
應者聞鹽色稍不如前大率用再減三四分方可  
易發李大叅卽日以賫捧行吳大叅望速促赴任  
鹽法必有專責庶經理爲便也地方事體苟心力  
可盡必不敢自懈秋間決擬親往視師何至動煩  
台駕如來教云云耶草佈不盡

又柬石汀

府江收拾停妥江道坦行無一非翁鈞威石畫所致諸道之功固不可泯而鄭君茂經理善後勞績尤多但屯守通道彈壓處分各項事體甚繁且難所賴以守之有恒行之無弊惟存乎人代者清妙溫雅誠有足稱而揮霍檐當處置精妥如鄭君之才可易得哉議者謂將府江敘錄之功請如張松林故事責之久任而移代者以補清軍等缺使始終以一人任之則必能仰體我翁戡定開闢盛心

所以銷萌保泰貽千百年之安者在是也連日籌  
度終以里閭之嫌不敢自決敢以請之門下倘賜  
裁可望卽具疏先發而後行會諒溪南公無有不  
從者此疏必仰祈大作仍借重鼎言於

廟堂諸老庶可得請若生則不敢輕具亦不敢輕瀆  
也留者未必甚願移者未必不喜我輩總爲地方  
大計非有他也

柬劉念菴

丁卯之秋弟以藩叅入賀載奉色笑少展開私別

來從萬歲華助勦兵革一緘之敬五六載不能通  
且恐故人洗耳也龍渠公來遠厯翰刻之辱死死  
如對仰見兄丈超情埃壒適志煙霞春色秋風無  
非樂事天壤間何以代此顧兄丈文名日高著作  
日富迺獨吝一惠示得無鈞天之樂非里耳所傾  
者乎弟以顓蒙濫叨邊寄役役干戈之務殊背夙  
心蘭水壺山夢寐相親久矣以疆場多事義不敢  
言耳仰頌東籬之歌五湖之記祇增媿悚勲臣遠  
使禮非敢薄特荒涼之地無以爲情爾歟甚歟甚



東殷石汀

昨承手教林酋挈家僅三船下海此其勢已無甚  
可虞適有自閩致書者云此酋見泊漳潮島嶼間  
未嘗流突蓋無非聽招意也計此時廣中已處分  
停妥矣懷徭節行該道撫處分別且聞縣鎮居民  
今通濟米鹽者甚多則尤易爲之時也在各道力  
行與否耳總帥之意今亦頗悟云但得東省營兵  
五千如數卽發益以西省操兵長安守兵卽當率  
之以從事猪肉河潯諸賊隨立堅營板江相機剿

撫不必專待測兵亦無用久役狼兵矣審爾則工程不尤爲簡易直截者乎謁見時惟門下一面命之

又柬石汀

懷遠事屢屢誨指敬當佩服湖兵一節已摘行司道議處矣此兵之借本非得已一時文武同事之人皆謂非此不足以成夾擊之勢至云當以萬計於時姑議三千蓋誠慮餉餽之費驚擾之患約會之難故也大都撫安分別最爲目前急務如果談

道以實心實意爲之則三面皆固羣黨且携工程  
稍簡而易卽靖州五開二路仍用把截足矣雖經  
具題亦何嫌於中止耶生向發奏留䟽時致書豫  
所公亦具道此中剩餉不敢輕費及討罪之舉主  
於正法不在多戮爲功之意請於題覆䟽內許以  
相機撫剿之便計藩臬二長已面陳之矣承教清  
海大䟽淵猷石畫翁所以爲東南百萬生靈計者  
何其至也此役竣則嶺海真稱無事矣張鳳臺侍  
御至備道

廟堂以翁勛庸蓋世旦夕寵晉樞衡所少需者欲了  
此寇耳嶺東䟽入且先有殊常之恩命矣附此預  
賀

又柬石汀

承差自京回得本兵覆䟽懷遠添兵事體悉如原  
議矣

廟堂之慮無不周詳而二三老手書與門下及生所  
惓惓分別簡易之意尤相符合真可謂明燭萬里  
之外矣仰體尊教湖兵決計不用矣其他欲爲巧

取之計惟有掩襲購擒二策而已訪板江諸徭方  
立柵自固所以防我者甚堅掩擊之計旣不可施  
而徭人報復念重非有大兵壓境即以重賞誘之  
無肯縛其首以獻者則購擒之計又似不可必遂  
反復籌度惟先行撫處大加分別仍用狼剽全師  
而進止處近江近縣之寇則工夫簡易直截兵不  
久勞餉不厚費罪人可得王法可正卽吾事畢矣  
此皆翁之神算也亦不失生昨歲原議以全師而  
行摘剿之意也計

廟堂之意斷不越此愚慮以此爲必可行若總帥該道不力行之猶肆他說以搖奪阻撓則生寧親督之以從事彼中卽不煩主將亦可也我輩之心主於完公家之事不以一毫有功之心存於其間則馬往而不得哉卒卒附白

又東石汀

差役回承翰示懷遠事宜備悉推誠至愛感激感激此事當從簡易實生之初心也卽今春兵退之後總帥談道務爲張大其事生與之反覆論辨動

氣者數四卒之稍從制兵之議者竊慮東省海上之防未可遽撤未必如期而應故也旣奉台允則制兵皆可不募矣然又竊思之懷遠比古田事體相去遠甚當時所以爲必討計者以部科責成之切故耳今

廟堂之上旣從寬假聽此中操縱緩急之使我輩何苦汲汲於勤師動衆自傷陰隲且以勞擾此一方民哉鄙意暫停大征之議惟專事於購擒掩擊二策假之歲月以圖之當無不濟者連日因直指君

閉門服藥候一面議即有以復於門下也生即緣此得罪欣然歸田里中矣附請

東胡廬山

兩載追從日承欵益匆匆爲別平生中曲所未傾吐者尚多迭承手教轉益悵然更回得悉太夫人起居且聞榮蒞有期尤副東人之望殊慰地方之事屢厯傾示固所以軫念西人其垂情於僕者尤厚矣小寇不煩大舉此僕之初心也順剿之議意正坐此不謂天時人事輒爾相左至有特舉之圖



然設法撫處大加分別以安其反側携其黨與而專事於倡惡諸徭此又僕之所惓惓切切而責成於共事者也顧總帥輩動欲張皇其事僕與之反覆論折動色者數四始稍就省約此心之苦其疇知之近得

廟堂諸老手書有聽此中操縱緩急之便大都與尊教多同僕愚欲暫停此舉而惟爲購擒元惡之計何如尚需請之石汀公方可定議也賦役書冊已領旋當奉以行之

東詹咫尺亭

憶在嶺南重承教雅別來忽逾七載羈踪嶺徼卽  
尺素末由一通負歟何如惟公直節偉望中外傾  
瞻新聖當陽一時臺省坐言事禘職者皆光復其  
舊旋且超列崇階公獨假重外藩未卽徵入此其  
故莫得而究詰矣傳聞當事者稍從委曲以避諸  
閹豎猜心卽少稽臺寺之遷而公之清聲正氣益  
足以鑠古今播華夏矣何遽有謁歸之念耶不才  
淺拙公所稔知者疆場多故匡攘無能役役干戈

之務殊背所習壺山蘭水時在夢寐中矣真切

又東廵亭

懷遠事僕本心欲從簡易主於得罪人正國法足  
矣廼總兵談道必欲張皇其事僕與之反覆論析  
動色者數次而彼輩動諉之難致有湖淞諸兵之  
議今俱停止不用矣石汀公長嘆其爲總兵發乎  
爲僕發乎僕年四十方得子老母年且八旬用兵  
之事萬非得已豈欲以誅戮爲功自取幽明之譴  
哉會間萬致鄙意尤懇

副東張鶴樓 徐文臺

地方事僕深以勞擾爲憂掩擊購擒之計行之屢  
屢未有一應之者二策旣不可施則惟有大征而  
已然驅十萬之兵竭全省之力從事於不毛之地  
如毒民耗餉何且猺黨以數萬計若不大加分別  
設法招懷則玉石俱焚之慘於心旣所弗安而四  
面皆敵兵分勢薄可爲制勝之完策乎况湖漑二  
兵石汀已決意不用矣尚可不尋簡易之法而漫  
然爲一網計哉近本兵題覆有議定師期奏報之

文其意以夷情重大操縱緩急悉聽此中酌處諸  
老手書亦皆云云尤有屬望巧取之意無非爲地  
方省事計也僕意購擒首惡似爲最便必不獲已  
以全師專向近縣近江諸徭庶幾事體稍簡而易  
也何如

東殷石汀

近辰沅史兵憲揭稟求順土官男年幼與鎮溪保  
順仇爭聽勘難以應調且備言騷擾之害我翁之  
見何其神耶李帥所薦原任叅將吳良知已爲平

兵取去即洩兵亦未可必矣今所恃以前鋒者惟  
東省營兵耳李帥探訪賊中情狀云村立木柵舟  
置撞竿河列旛寨水陸之區晝夜爲備則此賊誠  
未可以易與者即大加分別而致力於淺近之徒  
恐吾之用撫雖誠彼之蓄疑未已糾連之患終有  
可虞此規模不宜太寬而兵勢決不可不厚也李  
帥云營兵盡須洩兵若襍以廣兵必不堪用望翁  
於嶺南嶺西等營早賜允發庶可濟此大舉也慶  
遠三州已報出兵矣永寧唐知州帶出獐生五十

人赴提學道考錄皆明官語通句讀循循有可觀者真太平景象也翁聞之當爲一快行且多給衣巾使彼速知爲善之利久而風移俗易賢於十萬之兵矣翁之德在西陲不與天壤并永矣乎生近聞大功弟之戚傷情殊甚餘悼不及縷陳

東陰月溪

廣寇林朱二黨懾於東嶺兵威挈衆航海聞泊在蓬湖島中蓋漳潮之交也廣中之戒方嚴恐其勢將奔突爲濱海之擾而秋冬勾誘之患人方憂之

敝郡傷殘之後戒心尤切仰仗高明飭防奮衛所以嚴於先事者計無弗詳顧守令在地方於修攘最切昔人所謂賢於勝兵萬人者非虛語也覲典保留雖有通行禁例然郡邑安危所寄則固有難以槩循者矣惟執事垂意焉閩南百萬生靈之大幸也生碌碌西陲無能裨濟老親多病呻吟稍竢冬間擬卽投効去爲菽水計矣惟獨憂鄉邦未靖恐無所於歸爾

東趙汝泉



奉手教惓惓仰見門下軫恤邊檄盛心非惟爲楚  
尤爲粵也雖該道意在免調而翁猶委曲督行非  
一體高誼何以有此近石汀頗以爲言輒議停止  
顧靖州一路寔徭寇奔逸之衝議者謂卽不得鉤  
刀手亦當用勁兵一枝以扼其後庶賊可成擒且  
免震鄰之患聞彼中有十三哨打手亦稱勁悍不  
審可用以進否又聞苗兵多與黃土都天橫嶺諸  
猓人有讐此間方招徠諸猓使爲我用若以苗兵  
經擾其地勢必驚潰是又益一敵也必打手

夙仇者方可用耳事在彼中難以遙度審酌機宜  
惟門下裁示

東內閣本兵

役回奉鼎札及公移俯示懷遠機宜不勝佩服諸  
徭之變本由縣官激成而一時造孽者寔惟近縣  
近江諸寨以故前議選鋒薄伐期於得罪人以伸  
國憲足矣不謂阻於雨雪致有特舉之議誠萬非  
獲已之策也聘自數月以來所以爲掩擊購擒之  
計者不敢不殫心力顧諸徭方長安再挫之後聲

言聽招通濟鹽米無何其疑愈蓄其防愈堅欲以偏師搗之則山深路隘難以突進而尤難以輕出又徃人報復念重即懸以千金之賞無肯縛其首以獻者二計皆無所用欲姑置之而徐爲之圖則兵威未伸撫處不固近邑逼於憑陵他夷伺而煽動是重有可憂者且長安守卒日事戒嚴罪人未問而兵食已坐困矣再三籌度惟極意分別設法撫安使三面皆固而以全師之力專事近縣近江諸徭主於聲罪不以殲殄爲功則事體稍爲簡約

時日不必久持而餉餽之所省亦不貲矣此督按  
與司道各官詢謀僉同及柳郡諸縉紳力贊其議  
輒敢以請湖兵已行免調湖兵止募二營本省土  
兵亦報赴調矣計期當在秋冬之交也卽今尚多  
方計處倘可撫而定可誘而擒則猶可及止也俟  
處分既定師期方敢題知端此先白

與李少梧大叅 劉巨塘憲副

懷遠之事

廟堂旣不欲窮治且不欲急治而尤惓惓於竒秘省

便之計甚盛心也僕之爲此謀亦殫竭心力矣顧其黨甚繁其防又固一切掩擊購擒之策卒無所施欲姑置之而徐爲之圖不惟長安鎮及融縣可虞即永寧融洛諸獍見猖狂如彼者且置不問又何所憚而不爲惡也二月十三日諸獍再出之時四處觀望待釁而動幸而銃手敵退衆方稍息此寔賴天威所致公所稔知者不亦大可畏也哉況本省各土官今年稍知畏懼一聞調命卽陸續以兵期報其事似難中止今惟極意分別設法招撫

使黨與旣携四面皆固而以全師之力專向道縣  
近江極惡數十村苟得罪人即可完案不以窮搜  
遠討爲功庶幾事體稍爲簡約時日不必持久而  
餉餽之所省亦多矣今湖廣兵已不調淞兵亦止  
募一二營一面尚多方計處若可撫而定可購而  
獲則猶可及止也必不可得然後舉之計期在初  
冬之候也倘

廟堂諸老問及望備道僕萬萬不得已之意至囑

束殷石汀

楊都司至在莊憲副之後得奉咨翰之示感激感  
激本兵覆議云云明有稍緩師期以待東兵之助  
豫老手書亦與及生者同且有不必急治之意我  
翁沅江之諭尤爲確示顧此意行之已久購之已  
勤該道以爲十分難必之事近不得已遣蕭紳至  
省令從義寧進彼中圖之看旬月之內若有消息  
則猶可及止也生神力交疲老母多病念歸甚切  
日惟望此一着即可完案進退固綽綽然矣未能  
如意爲之奈何永寧警報未息已節行撫戢融洛

諸黨且發操兵三百守寧永一百守永福矣倘未能伐其謀但可伐其交亦可保無事也巡察公及一時共事諸君皆謂夷情伺釁而動叵測如此懷遠之舉誠不容已亦誠不可不爲萬全圖惟以大旅而殲兇渠此即省便之計也適沈右江揭稟上下猺籠及黃土等寨撫處俱有次第矣衆寡難易之勢似可槩見台示即令楊照募兵但許文病後事多廢墜科場鹽軍及製造火藥諸事悉待楊照以理似不如王瑞之尤便云兵乞亟募必在八月



念旬至融方可倘土兵旣集賓慶二路則有難於待矣至懇

副東呂豫所 譚二華

府江自數月以來通夜而行獨舟而往商民告伐木者不下數千人行將覩開闢之象矣且軍興之需僅幾二萬善後諸費計亦不過萬金而一二年之後所贏之餉足償有餘誠出意料之外者秋毫皆仰荷成算何敢頃刻忘耶聘不才事出因人恩頒逾分悚惶感激難以名言惟是一時共事各官

未蒙風勵之典尤聘之所以跼蹐不安之甚者也  
其時大小將領固效驅馳追逐之能然監督副使  
鄭茂金柱僉事夏道南矢謀宣力寔兼統督之事  
而鄭茂善後之勞與副使劉穩謀始之畧地方所  
仗尤弘左布政楊成叅政胡直經畫樽節畢殫乃  
心大功之成始終賴之按察使高察每事贊襄副  
使劉廷舉留心紀察與桂林知府彭文質皆與勞  
之最者按臣覈疏可考也統乞破格敘錄示勤事  
之勸地方幸甚

東趙汝泉

地方之事屢瀆門下深切悚愧顧以夷情所關重大仰惟厚誼知不爲罪也靖州一帶迺徭寇必逸之區初擬借兵永順於策爲便繼以有故中輒而仰給十三哨打手腹背夾攻近得槐叅將報文辰沅打手僅可得千人其附近哨堡兵又鮮精勁止欲以備堵遏之役審如所云則奈何茲不獲已復有借募之議倘蒙馳檄所司亟行徵發討罪之舉所仰藉於威稜萬萬矣聘之感戢何足言耶冗中

勒此不盡

東趙汝泉 胡公泉 賈介石

自靖州長安營抵太平河里諸巢僅百里許道坦而易蓋建瓴之勢也廣右之兵即發至融縣距懷遠計程尚八九日則皆逆流仰攻勢險且難若靖州不以兵進而惟以一面從事終非勝算且恐遁突湖界延擾諸苗則西師之罪何以自解耶此中餉需甚詘調募之費不貲誠甚憂之蓋不得於永順而爲是無何之策也即已差官賫餉赴二道門

下矣師期約在秋冬之交萬惟亟賜分處

東史瑞石

別教所委敢不祇承顧清明之時自方面而上類  
多砥礪求自表見於世况粵西荒瘠之區稍知自  
好者必不甘心污下以不齒于士類一時見在藩  
臬郡長委無疵議數時與唐溪南道長私議大計  
無可以應例是懼非敢欺也卽一二離任官員廉  
之未得其真亦不敢率易具白有負枉問之意附  
復

東殷石汀

官役回兩奉手翰并示大䟽簡明妥當斷然不可  
易矣俟將遣兵而後題知尤爲確論感極感極  
兵調海南北二營并取楊照另募一營添用仰仍  
我翁區畫苦心尤荷楊照自端州回至今尚病已  
促之往矣第此官旣非熟遊之地又非素轄之兵  
令其自募誠恐無濟於事即海南北二營方有海  
上之防亦恐該道未肯遽掣也况募之潮中者旣  
杳然無聞而本省土兵出期且逼議者皆謂必乘

田禾在野不惟我兵得食而賊亦不得搬據岩箐以飽待飢廼總戎及該道之意則又以土兵不足恃而必有待於客兵然則將如之何哉生自數年來遇兩粵用兵數次未有如此行難處之甚者也衰病交侵何時脫此樊絡百望指示俾完此地方一大事則幸矣統督將領王世科旣非總戎所喜錢鳳翔僅可支持楊照且病惟王瑞會總戎於端州與語頗合屬望甚切萬惟亟發仍令與楊照同募兵而來庶幾不悞此舉也懇切懇切永寧永福

之報俱稍定矣

柬趙汝泉

頃者顓啓馳瀆計徹台鑒聲罪之師已計期畢集  
矣探訪賊中動靜所最憚者惟湖兵蓋兵精而勁  
旣以素寒其心道近而夷又可直搗其背而臺端  
威稜遐厲尤足示震懾於遠夷也此路得進一軍  
則事半功倍可必矣顧求順之兵不敢固請而營  
堡兵壯必資厚集以成必勝之勢方爲計之全者  
惟亟賜督行不任感激



東萬合溪

羅都事來得奉台教之辱慰仰何可言廣寇航海  
飄突漳南者患近而淺投竄異域者患伏而深如  
濱海之憂桑梓之慮何聞凝齋公祖即日鎮臨門  
下經畧贊襄所以措海邦於衽席者當靡有遺策  
矣或者天心厭亂黜酋自殄於洶濤之中則又意  
外之幸也此中府江之平無非門下夙畫即今孤  
舟獨旅水陸無虞商民告伐木者以數千計山徑  
大通茲漸治沿江緯道行將覩開闢之象矣何敢

忘何敢忘懷遠聲罪之舉與除患之師不同苟用  
殲兇渠伸國憲足矣窮黷爲事非僕之所爲心也  
府江費餉僅及二萬司帑贏積尚足支持近大司  
農不允奏留之請蓋知有此數故也門下惓惓西  
事敢瑣及之

### 東殷石汀

連日迭奉台教仰見我翁軫念西事無所不極其  
慮永寧報息諸兵已發回惟上宋常狼要尚有數  
十徒出沒理定江次已嚴行康仁防範此孽招誘

之情甚真幸早覺耳密行永寧道設法購之特驚  
弓之鳥一時未可遽獲也懷遠諸徭所恃者山水  
之險與鐵甲重綿無裹糧聽糾負重遠涉之理可  
無患也榜示久已遍發亦分投差人開諭之蕭紳  
在彼中聞亦有處分要之懸購終難用以羈縻分  
別足矣各道叅等官云此舉必不容已必不可不  
萬全蓋非但爲懷遠計爲遠近諸夷計也楊照雖  
病奉檄不敢不行旣蒙先募則付之領歸亦便董  
龍恐必不肯西來且原任官員終難行事王瑞得

九月中到此亦可及也望之甚切幸亟促之萬不  
獲已以門崇文代之何如此將夷情畢竟諳熟且  
絕不需索土官如錢鳳翔輩未必過之近日永寧  
一行帶兵親至鳳皇巢等處一示振揚喚出十里  
獐老軟血甘結亦不徒行也翁東事尚在繫心此  
間曉諭防禦諸事生不敢不殫心力但省下苦於  
無兵動輒束手近亦有寶慶兵二營投募倘有竊  
發可朝聞而夕遣矣奉佈不備

柬胡廬山

一別倏餘半載矣念無日不東之府江仰藉芳猷  
今通夜獨舟經行無恐商民伐木者不下數千人  
行將覩開闢之象我輩廓清一念庶幾不爲徒勞  
每念至未嘗不德我廬山仁山爲西人造福如彼  
之厚也何敢忘何敢忘生自夏杪以來齒舌作患  
已五十餘日日惟稀粥二三噐而已形神交疲歸  
念甚切以西事未竣未敢易言耳奈何

又附東廬山

府江覈功䟽已發二丈芳績溪南公已備頌之僕

不自揣於豫所諸老僭一申懇媿不足爲二丈重  
也嚮者報捷之䟽承石汀公屢書來示從楚中徑  
發僕書覆決意差人會於廣中後因懷遠休兵二  
道總戎與王叅紛紛交構意必不免叅論之舉一  
時諸公皆謂功罪不宜相併力勸亟發功䟽故不  
獲已徑發此情彼時即達之石汀矣及本兵議覆  
石汀未及加恩者蓋其時

廟堂之上已聞廣東大捷欲留不盡之意以懋加殊  
常之典耳非以題報之先後數日爲重輕也聞廣

中諸公有未知此中情節罪僕不約石汀者使僕  
負媿且悔焉奈之何丈幸爲一白之尤荷僕母老  
子穉生平以殺戮爲戒以此蒙恩非僕之福亦非  
兒子之福丈乃以爲賀是益吾懼也益吾媿也統  
惟炤察

東殷石汀

適得家報潮寇已飄突閩海豈卽林酋之黨耶俞  
將軍恐不能支奈何朱良保等聞已圍困想不日  
成擒所示操募二兵幸賜早發自道總視之則爲

芸人之田自我翁視之則皆已田也懇望懇望王  
瑞并楊照促令速赴尤懇

柬俞虛江

昨從者回業已啓復適接七月中家報知廣寇果  
突閩中掠海口調用船三隻而去又有別夥將自  
平海登岸者如家鄉多事何閩人已不堪重困况  
莆陽乎懸切懸切問之西垣云渠手中置有大船  
二十隻兵火之器所積甚多諒自足用惟是湊兵  
近多減半不審今作何處便中幸教牙患甚苦諸



不贅及

東殷石汀

古田殘孽反側之念無時無之而近來造端則始於常狼要蓋狼要本鳳皇巢之族乖覺無狀一向逃往上宋而又不服常安鎮管束常安有大和村獐人黃銀成者其女爲常顯忠取之爲妾銀成往來鎮中甚密諸獐憤之狼要於七月十五日率黨二十餘徒將黃銀成殺死掠其妻男并牛七隻將牛歃血祈神糾衆謀攻常安鎮此禍之始也後右

江諸賊因節次牌榜撫諭多不聽糾狼要知其罪  
不可免乃聚集附近獍賊以千計於上宋等村屯  
劄及見省城官兵至彼策應遂潛踪匿跡稱已解  
散甘結擔保而該道叅亦遂信其無他請掣省兵  
不謂兵回數日十五日忽出永福五里灘刦船傷  
人隨圍鳳皇堡此堡係黃憲副新設僅有土兵數  
十名分賊田給之耕守月領魚鹽銀一錢七分大  
都有名無實老弱居半也狼要與附堡之獍欲逐  
之甘心久矣乃彼此合謀用熟獍誘令頭目常受

開門輒哄然而入常受等不及措手致被殺死及  
談道發百戶張汝能等領兵往援又被圍困幸而  
奮敵衝出斬獲數賊而始少退今尚聲言攻打堡  
鎮即四里諸僮亦多交通夷情叵測如此誠有大  
足慮者已發省城募兵一千名往永寧仍以門崇  
文統之操兵四百名往理定聽康仁領之相機防  
捕且嚴促三州及永順兵先出以備調蓋賊勢重  
大不得不過爲之防也鳳皇堡兵逃出尚衆雖被  
害不多然其跳梁之狀糾結之勢詭譎之情必不

肯遽已今惟一意嚴守州鎮其古滿桂林嶺二小堡亦僅僅數十人行談道酌併大堡可也王世科在融縣以病回柳州不得已以許文暫代矣此間缺兵而又缺將奈何王瑞楊照萬望亟促早來營兵併祈速發庶幾稍有濟也

附柬張鳳臺

古田殘孽反側之念無時無之近有常狼要者本鳳皇巢之族也性素狡慧一向逃住上宋村巢而又不服常安鎮鈴東有大和村獐人黃銀成者其

女與帝顯忠爲婢銀成往來頗密諸獍憤之狼要  
乃率黨二十餘徒殺銀成掠其妻孥牛馬常安鎮  
謀欲擒治其黨彼遂歆血糾約六里及海灣等獍  
之懷異心者以數百計出沒五里灘掠船傷人仍  
用熟獍計賺鳳皇小堡開門襲入蓋此堡廼黃憲  
副新設僅士兵數十名原無工食取鳳皇殘黨之  
地而耕之狼要與附堡諸獍欲奪之甘心焉久矣  
幸諛道援兵至邀殺數級賊始少退報至省城是  
夜發兵入永寧永福防護截捕今又潛踪山等處

但勾結之謀尚未已也公向所見教海灣等處不  
容不一處者茲不益信矣乎僕嘗閱貴省夷情韓  
襄毅公藤峽之功最偉然必二三征而後大定永  
寧之孽何嘗一日忘報復之心自昨歲富祿一警  
之後僕竊欲摘鋤一二以示懲創顧道叅數數更  
易無可任之者且別有所忌也此行似不可已矣  
卽懷遠之舉乃一省夷情觀望所係當事者每每  
以易視之此僕之所以益苦也柰何廣中山海賊  
勢若何便希示及僕患牙餘二月矣匆匆不能盡

東蔡敬齋

夏間藤縣蘇尹還滇之便附候計已徹鑒懷遠聲  
罪之役近得部咨永順鈎手仍舊徵發蓋因汝泉  
公之咨而議行之也汝泉共濟之誼令人感激第  
五開一帶爲猺寇逸路尚多非藉威稜督行所司  
嚴加堵遏則奔突糾投之患不無可憂者惟臺端  
終惠馬西氓所仰荷帡幪者非淺鮮也潮寇飄突  
閩海掠舟而北將來濱海之區能晏然乎又重爲  
鄉邦慮兄翁計已先聞矣

東趙汝泉

頃者兩啓奉瀆計悉徹台鑒矣適得部咨永順鈞  
兵仍舊徵發蓋緣臺端之咨而議行之也我翁恤  
鄰厚德共濟高誼此豈常情所易及近世所多見  
哉此中各州土兵日下畢集進止遲速惟視湖兵  
若多候一日則所謂百姓之費公家之奉殆不止  
於千金矣槐叅戎雖不敢委重統督第靖州距懷  
遠甚邇即一遙示麾指仍以孟守備行之其所藉  
於規籌者不淺矣何莫非翁之賜也耶顙此載懇



惟台慈終惠焉

柬殷石汀

永寧事情昨承差董大祐行已具白門下二十五  
日辰刻永寧道報警甚亟賊見圍桐木鎮已殺其  
二賊尚不少退聞張二叅已督兵援桐木矣適又  
有約日圍常安富祿之報大都倡之者常狼要而  
陰附之者不獨下六里即上四里亦多有之蓋其  
心必欲去三鎮而後已也幸右江賊不附耳茲又  
發省城募兵一營往永寧聽用如再有報則總帥

不容不行矣議者皆歸咎生當時不贊翁久留土  
兵盡鋤餘黨而又不力阻立鎮之議致鎮兵殘虐  
六里故有今日噫我輩苦心將焉訴之事勢至此  
誠有不容以竟已者奈何生孱然病體當此多艱  
寢食爲之俱廢險夷得喪惟有此心百凡惟終教  
之

東呂湘泉

嶺南別後八載于茲矣賢郎入試得拜手教兼聞  
山中動履感慰何如灌陽清賦本爲通邑生靈之

計非家益而人悅之也幸方守沆力任之終歲劬  
勤始克就緒竊謂永世之利當在于茲而歟歟之  
口不免焉即臨桂亦然信乎任事之難也非賴執  
事者以公道昌言之天理國法將漸盡矣後之任  
職者孰肯爲地方擔當一事哉念之長嘆僕邇來  
賤體多病又當多事之秋古田有常孽狼要者率  
黨倡亂方在發兵應之羽檄旁午形神交疲長林  
豐草之思日惟切切顧懷寇未殄未敢易言耳冬  
春事竣卽投効去矣匪欺匪欺

東殷石汀

永寧遺孽初謂止常狼要一人爲首適得永寧州  
揭報四月內有常酋孫常扶仰者乃狼算子也充  
九江衛軍逃回發常酋所藏七百餘金遂與鳳皇  
親族數孽逃倚上宋常狼要巢分金招黨輒有此  
亂若非仰仗威嚴右江諸賊招之不赴即有省城  
募兵應援幾於不可制矣但今之事勢有難處者  
各州土兵皆約齊於此月中畢集無彼此並舉之  
理而六里賊黨以數千計募兵一掣勢必復出爲

患又不可不重爲之防計惟嚴督三州將見出兵  
各撥足原額以固三鎮而又於各州司土兵內摘  
發一枝以備州城如聽撫則爲防守如出沒則爲  
截捕俟懷遠稍有次第卽挑發數枝摘剿首惡其  
餘悉從撫處何如但適報各賊又聚於富祿鎮地  
方幸發兵至彼哨捕大挫而遁則跳梁之狀猶未  
可測也永寧道之意急於一處尚在計議耳彭守  
謁辭之便草率附白伏惟裁示仍督勵將吏行之  
東兵并叅將王瑞望亟促赴用不任誠懇

東吳自湖

我翁勲勞在

社稷功德在東南中外縉紳莫不以翁之出處卜世  
道輕重樞衡

寵命昕夕當下西江竚賀竚賀嶺東近捷視二源首  
功相埒而課功之典今昔夙殊時使然也然翁之  
崇功偉烈則固紀之旂常垂之竹帛矣豈一時烜  
赫所倫耶聘以庸謏濫役茲方多事之區無一可  
伸眉日頃古田遺孽常狼戾者因仇殺一獍土司

欲擒治之輒糾黨爲患幾不可制仰仗威庇旋已  
底寧第情狀叵測未卜其終何似也我翁不棄願  
督教之

東呂豫所

古田殘孽反側之念無日無之近有常狼要者常  
酋之族也住上宋村不服常安鎮土司鈐束有獐  
人黃銀成者其女與土司爲婢往來親密爲諸獐  
所嫉常狼要乃率衆殺之掠其妻子牛馬而去土  
司謀欲擒治之狼要遂糾黨爲亂幸右江諸獐獐

先已禁戢不聽糾結惟十里及永福海灣諸獍多  
應之衆號數千出沒永福五里灘及攻圍鎮堡賴  
省城發兵策應俘馘二十餘徒始挫而遁若非仰  
仗寵靈先事以代其交發援以挫其銳幾於不可  
制矣但賊非外至聚則爲賊散則回村急則告招  
緩則復熾其情狀未可測也議者謂六里三鎮勢  
不相容使非摘處一二倡惡以示懲創則歲歲報  
警日日戒嚴恐三鎮終不可固永寧終不可安也  
嘗考粵西夷情韓襄毅藤峽之功最偉然旋服旋



叛數十年間三征而後大定誠以豺狼之性與犬馬終殊鷓鴣之喙與孔鸞迥別也所恃者

國家有常伸之威耳懷遠之師計在十月可舉今一面督發東蘭那地南丹三州各出兵二千以實三鎮之防別發土兵一枝以固州城之備且多方招諭以示羈縻矣倘蒙門下念已成之功圖永安之計許以便宜稍加芟剔或宥其脇從計縛渠魁廢幾以一警百地方可免後虞弟聘亦得以少謝不職之罰矣懇瀆

東董幼海

尊札發自正月至七月初旬始得拜教詢之來人  
廼靈川辦事吏因病滯留之故也適方子有入簾  
之役佳刺屬之詮次茲方登馬俟畢梓當卽馳請  
也台諭

廟堂鎮定之意仰仍肝鬲真愛感激感激惟懷遠之  
變戕官奪印事體重大弟毋老子穉日以殺戮爲  
戒業已達之

廟堂擬計獲兇渠可以無事征討頃得諸老手書則

又以此舉係諸夷觀望必不可已茲不獲已又將  
誓師矣但討罪之役主於正法伸威必不敢以殲  
殄爲功有負雅意統惟垂亮

柬殷石汀

吳天賞領募兵至得奉咨翰感甚感甚但二總共  
事稍有未便而天賞亦甘心告退聘不得已暫令  
吳天賞督蒼梧操兵二營爲策應哨以王槐專領  
募兵矣烏合之衆未有節制望翁令下總戎嚴行  
督約聽以軍法從事庶稱有制之兵也永寧殘徒

名雖聽撫然上宋一黨與海灣諸獍晝夜深伏所以爲防甚堅且於永福江邊大肆猖獗傷巡哨兵三四十人兵寡賊多山深草密襲剿之計難以遽施又碎江廖金牙殘黨仇恨排年向歲引兵征剿亦聚衆圍燬大水田兵堡鈔掠近村皆常狼要陸銀床倡之也已遣兵策應之須二處稍稍停妥方便於西發也地方多事如此奈何此間營堡積弛已久兵旣虛冒而堡用竹木爲圍茅草爲屋一火即爾蕩然大爲可恨茲通行各道大加修葺必堅

築牆垣深浚溝塹蓋造營房方可少固防守即有  
所費亦不宜惜行稿奉覽倘蒙均賜督行地方之  
厚幸也湊兵爲采山年兄堅候部咨至八月間方  
行召募九月初旬在金華發行計十月望後方可  
入粵事多蹉跎如此又奈之何

柬張鳳臺

殘孽常狼戾糾衆爲亂八寨三峒諸寇絕無應之  
者惟貴縣邊山惡獍助惡甚熾陸銀床父子實罪  
之魁也近且糾碎江廖金牙殘黨亦爲患陽朔江

至則遁兵退復肆斷非要約所可羈縻者也蓋各  
賊與三鎮勢不俱容若非大加懲創恐鎮堡之防  
終不可固且重爲永寧憂之即永福之防亦何時  
可已也茲已調田州向武兵二枝萬餘約得實兵  
五千分布陽永二縣要害及省城屯劄緩則固守  
急則截擊俟懷遠竣役挑其精銳引以東向一痛  
處倡惡諸村庶幾地方可冀有安枕之日也貴縣  
守兵目前不下千人康仁既有專責茲又委門叅  
將專劄料理矣可無煩盛慮也報復之說聞誠有

之蓋謂公發常酋之匿而又常有邊山之議屬垣之輩遂因而恐嚇播煽之理或然也僕幾欲請令郎入省居住恐搖動衆心坐是中止惟酌示何如

東殷石汀

碎江廖莫諸賊被官兵擒斬四十徒雖已竄遁未即解散常狼要等亦尚窺伺於海灣山中不日將士西發必有乘虛流突之患田州向武二州兵調尚未至雖分委三將統領防捕不可無專道監督幸吳大叅至即以屬之矣湖兵聞調將出但只

官交割議用此中將官一員統領目前之人不得  
已以魯國賢往矣三州實三鎮兵已到雖不能如  
數氣勢已稍壯矣分隸收糧之事向者臺下督責  
再三諛道未有着實奉行者以鎮兵之虛不足鎮  
壓諸獍恐激成變亂故耳以近日事勢觀之行亦  
叛不行亦叛不若乘此鎮兵稍充之時斬截行之  
每鎮遣官一員監其收糧使無過取之虐庶幾兵  
有固志而殘徒亦少戢異心也如果不服總不免  
摘處一二倡惡看向背何如耳師期之疏以士兵



未報督發難以刻期且欲添入殘徒爲患順師摘處一節亦一時共事者意也統容一二日揣馳請教

又柬石汀

常狼要見官兵稍集率其弟族數人奔遁柳州五都招賊爲助被官兵生擒解道不惟人心痛快即古田諸良獍亦共快之廼其弟狼金輩遁回糾賊數十徒襲入理定堡欲執哨官以爲僑償贖出其兄官兵覺而逃出據報徑傷兵六名然而損威殊

甚此間堡敵兵虛官頑將情每遇賊至率棄去不  
守雖加痛治已無及矣即今殘徒尚在竄突無定  
處處皆防而永福之仇猶深其防尤不可懈必俟  
向武田州二兵至省分布而後募兵方可西發也  
省下投募兵三四營初若爲多數時非得此兵及  
承發募一營則束手無策矣蓋知多事之地不可  
去兵也今歲土兵報出本早只因有稍遲之說道  
衆各官輒爾緩催至今猶未盡集然計此時必到  
賓州督發之期不出長至前後總帥數日內行矣

師期疏中亦止槩言耳疏稿奉裁惟速發惻惻中  
入殘徒一節盖省下人士絡繹赴京不得不一報  
也亦溪南公相議云云耳吳天賞王槐無甚大事  
但兵心有屬與否耶吳天賞已另處營兵與之統  
領王槐聽總戎區處必不得已暫留之何如王瑞  
聞已來中止坡頭哨苦於乏人門崇文訓文皆總  
帥所甚不喜門且有永福之委將若之何

東史蕙津 槐叅戎寅

湖兵聞久已整棚至十月初旬趙汝泉撫臺再遣

旗牌至沅督調又經月餘矣廼今猶聞未集如何  
此中師期已戒極遲至是月念八日必發板江計  
抵太平河裏諸巢必不出初四五也若湖兵月終  
方抵沅州則後期甚矣事無中輟之理萬祈亟促  
以副夾攻是所引領切望餉米夫船等項勢必取  
給彼中計貴道宸沅道亦行之早矣特恐有司鮮  
一體之誼耳顧師行糧從糧有弗繼則橫掠之患  
恐所不免又豈有司所安哉併望加意督行轉達  
毋致有悞兵食以免地方之擾不惟爲粵亦爲楚

也至懇

東殷石汀

差役回奉翰教惓惓以瓶罄爲憂仰見軫念西事  
感悚倍切聘疎劣平生拙於經營然節縮一念未  
嘗不切切昨府江一舉費餉僅二萬有奇時無募  
兵故也今則舉大動衆造舟繕械視府江大不同  
五萬之議尚恐不足聘思而憂憂而病者久矣百  
凡局縮大拂同事者之心形之詞色亦屢屢矣豈  
得已哉近行藩司查理兵餉東移西湊以足目前

之需而古田餘餉尚存九萬之積未敢輕用昨疏  
中七萬之說亦言其槩以祈懽奏留之數焉耳倘  
可得請勉強支撐以竣此役則大幸矣此外惟催  
解民欸清理稅畝勤督鹽利并請臺下嚴查廣東  
橋稅及精兵折糧銀兩以充梧鎮而已別無神縮  
鬼輸之術也惟翁裁示省城戍守狼兵專責之鎮  
安思恩田州三處屢屢申擾蓋以戍梧而又戍省  
情委不堪故也且出兵甚少緩急無賴不可不一  
酌處之已行各司道議詳併乞一體督行尤地方

之厚幸也懷遠之師十一月念八日方在融縣督  
發計膺十前後方得聞抵剿消息屢督促而主帥  
持重固如是也碎江賊多遁荔浦今該道叅相機  
處之海灣賊多遁上宋未易卒圖耳併白

東殷石汀 唐溪南

懷遠之師十一月念八日始發融縣膺月初四日  
開刀各猺聚板江水洲爲旅拒計及見大兵夾岸  
蔽江而進望風奔潰遁入蕉花田寨諸山雖獲功  
未多而兵聲已振賊膽已寒似有可破之勢矣永

福事體張鳳臺亦貽書屢以爲言邊山灣海諸惡  
村及上宋諸賊其在必處無疑但目前田向二兵  
未足辦此且永福諸賊皆奔合古底上宋若以偏  
師一面攻之則東奔西竄竟難收拾不得已擬俟  
西師稍有次第方摘發三四州勁兵或從永寧或  
從永福背面合擊庶幾可以成功不然如總戎之  
近撲下陋徒驅之散遁而已碎江賊多遁荔浦占  
據山灣府江道叅督向武兵剿之竟獲二三十功  
而哨官張世勲傷故得不償失奈何今不得已順



遣永寧王參將督其部兵及田州兵協之矣益知窮寇憑險未可以草草爲也附聞

附東張鳳臺

帝狼要首倡釁端而陸銀床廖金濫皆附和之也狼要近已就擒其弟狼金糾同海灣下陋諸賊夜襲理定堡欲執官僑當以贖其兄雖傷兵僅數名然損威甚矣海灣上宋諸賊之罪在所必剿無疑也僕初擬調向武田州二兵至貴縣時看機有可乘先將海灣數村撲之乃諸賊一聞兵至為防甚

堅又因總戎西發順撲下陋機事不密且無合掩  
之兵不能收功徒驅之散遁而已今邊山海灣諸  
賊或投古底或匿脩仁碎江諸賊多遁荔浦一時  
二州兵力未能大有所爲不得已擬俟懷遠進兵  
稍有次第即摘發三四州勁兵或從永寧或從永  
福背面合擊庶幾可以成功蓋諸賊本皆族屬巢  
穴又皆相通若徒以一面攻之東奔西竄竟難收  
拾謀之諛道及叅備等官大率如此近司訓令叔  
枉顧亦云各賊皆不在巢徒巢無益目前姑爲守

計少需之耳計不出正月中也立堡屯兵皆事勢  
之必不可已者近有民徭告請助兵殺賊賊退則  
復其故業卽爲守堡之兵俱已允行且見出兵三  
百協守城廂矣苟可以盡此心力僕決不敢自懈  
以孤知愛負地方也康仁失事本欲亟處屢承台  
示及溪南公相議目前無可以暫代者姑令戴罪  
殺賊以自贖耳王叅將志力果銳因碎江賊奔荔  
浦談道請將兵甚急暫遣之徃旋當入州視事亦  
以西師尚未即移故也此時貴縣城廂及附近村

落皆保無恐知公留神之亟瑣瑣惟情炤

東呂豫所

頃奉台劄惓惓以府江額餉爲憂仰見垂軫地方  
感刻何任府江之餉取足梧鎮按季請支未嘗有  
缺惟近議善後借支五千兩向未有發及梧鎮應  
解布政司年例餉銀一萬七千兩專備省城戍守  
狼兵及附近各營堡兵食近三四年間東省用兵  
南雄橋稅與廣南韶三府精兵折糧銀兩應解梧  
鎮者多留彼中支費遂使梧鎮轉解布政司日少

積欠以數萬計至有全年不發者此司帑之所以  
益匱而兵防之所以日虛也蓋彼此之分勢所不  
免爾懷遠之舉餉餽浩繁若日前奏留之數不蒙  
賜允古田剩餉僅存八萬之積勢必支費過半他  
日地方有事何以能支用之易竭取之無門聘所  
思而憂憂而病者久矣苟可少從節縮不敢不殫  
此心顧多事之秋勢有不容以已者夏間有懷遠  
寢兵之議小疏已具因右江各道及諸縉紳力言  
此舉與否實百蠻視以作止其惡廼不果上及九

月初旬再奉

廟堂明示方敢定計徵兵則是役誠萬非獲已之計也今仰仗寵靈幸已克捷但諸猺素恃兇狠據窟穴未易討平遠近觀望必不敢以惜費之故苟且塞責而永寧殘孽尚熾奔投修荔山灣諸巢其窺伺三鎮及永福之心未嘗一日已也防剿之兵隨處皆不可缺使非帑藏稍有存積地方之安危實係之也伏惟亮察特諭所司俯從原請并將以後三年贓罰事例一併留用使懷遠善後之費得有

所資則古田存剩之餉方可少積庶地方以安而成功可保也懇切懇切

東俞虛江

使來承教公已養高甘遜絕意吞胡此爲天下國家謀則非爲公謀誠是也此中征徭之役仰仗寵靈幸已破賊矣永寧遺孽常狼要生擒其徒黨賊馘亦衆顧狼虎之性終不可馴未卜究竟何如耳僕亦倦遊矣干戈稍戢擬卽爲歸計矣李山人屢促不歸士固有志似難以強逼之也丁山事無不

留情况有公命乎草復



郭襄靖公遺集卷之二十四終